

ILUARSISSUTIT

Inatsisartut inatsisissaattut siunnersuut 4. august 2016-imersoq taarserneqarpoq.

(Inatsisissatut siunnersuutip qallunaatuaa naapertorlugu qulequtserneqarnera aamma kalaallisuumngortinerani iluarsissuteqarnikkut aaqqinneqarpoq.)

Siunnersuut uunga: Qimmit qimuttut kiisalu qimmeqarneq qitsuuteqarnerlu pillugit Inatsisartut inatsisaata nr. xx, uu. qq 2016-imeersup allangortinneqarneranik Inatsisartut inatsisaat

(Aalisarnermut, Piniarnermut Nunalerinermullu Naalakkersuisoq)

Saqqummiussissut**1. Siullermeerneqarnera**

Matumuuna Naalakkersuisut sinnerlugit qimminik qimuttunik kiisalu qimmeqarneq qitsuuteqarnerlu pillugit Inatsisartut inatsisissaattut siunnersuut saqqummiutissavara. Siunnersuutip imaraa nunatsinni qimmit aamma qimmit qimuttut nungutaannginnissaannik qulakkeerinnittumik akiuussusersuinissamut nalunaaqutsersuinissamullu suleriaasissamik nutaamik eqqussineq.

2015-imi ukiakkut ataatsimiinnermi Naalakkersuisut peqquneqarput qimmit qimuttut kiisalu qimmit nalinginnaasut qitsuillu immikkoortillugit inatsisiliuunneqassasut. Suliaq taanna suli ingerlavoq ukiullu marlussuit iluini inatsisissatut siunnersuutit taakku nutaat saqqummiussinnaassallugit naatsorsuutigaa.

Taamaattoq inatsiseqartitsivimmi tassani pinartumik maannangaaq allannguisoqarnissaa pisariaqalersimavoq. Taamatut pisariaqartitsilerneq pilerpoq Avannaani ukiuni kingullerni sumiiffinni arlalinni qimmit nappaataannik eqqugaanerujussuup kinguneranik. Taamaammatt Kalaallit Nunaanni qimminik qimuttunik siunissamut qulakkeerinninniinnermi uuminnga siunnersuuteqartoqarnissaa pisariaqarluinnarpoq, taamaaliornikkummi qimmit nappaataata siaruanginnerani qimmiutittalu allat toqoraalinnginneranni ajornartorsiummik qaangiiniarnitsinnik sakkussaqaalissagatta.

Sakkussatut taaneqartut ilaatigut tassaassapput akiuussusersuinernik malitassaq nutaaq, tassannga inatsisitigut piunasaqaataalissalluni qimmiutinik qimmit nappaataannut akiuussusersornissaat, qimmeq qimuttuugaluarpat, savaatillit qimmerigaluarpassuk imaluunniit nalinginnaasumik qimmiugaluarpat apeqqutaatinnagu. Aamma inatsisitigut piunasaqaataalissaaq qimmit akiuussusersorneqarnerannut malinnaavigalugu nakkutigisinnaajumallugu qimmiutillit qimmitik nalunaarsorlugillu nalunaaqutsersortarnissaat.

Qimminut qimuttunik savaatillillu qimmiinik akiuussusersuinerit Nunatta Karsianit aningaasalersorneqassaaq, aliikkutaraluguli qimmiinnarnik qimmit namminneq akilertassavaat. Aningaasartuutit taakku aliikkutaralugu qimmiutillit akisussaassuseqarnerminnut atatillugu akuersaarneqarsinnaasumik naammaginartumik akiliisarnissaat naatsorsuutigineqarpoq.

Naalackersuisut naatsorsuutigivaat inatsimmik allannguinnikkut Namminersorlutik Oqartussat aningaasaliisussanngortinneqarnerisigut nunami tamarmi qimminut qimuttunut savaatillillu qimmiinut tamanut akiuussusersuinerimik ingerlatsilertussaallutik. Naatsorsuinerni ilimagineqarpoq qimmit pineqartut katillutik 18.000-it missaanniissasut.

Akiuussusersuinerup atuutsilerneranut atatillugu naatsorsuutigineqarpoq ukiumi siullermi (2017-imi) Namminersorlutik Oqartussat 4.500.000 koruunit missaanniittut akilissagaat. Siunnersuummut nassuiaatit naliginnaasut ataanni tabel 1-mut innersuussineqassaaq. Naalackersuisut matumani aningaasartuutissat 2017-imut aningaasanut inatsisissamut siunnersuummut ilanngullugu naatsorsuutigereerpaat.

Najukkami akiuussusersuinerit nalunaaqutsersuinerillu suliarinissaat kommuninit akisussaaffigineqassaaq suliassaqaarfillu Naalackersuisunit nakkutigineqassalluni. Naalackersuisut aamma qimmit nappaataannik akiuiniarnermi pitsanngorsaatini siunertamullu naapertuuttunik arlalinnik suliniuteqassapput, taamaalillunilu kommuni suliassaat malunnaatilimmik oqinnerulersissallugit. Tamanna ilaatigut pissaaq paasissutissanik katersiviliornikkut, tassuuna nalunaarsuinerit allallu oqinnerusumik aqunneqarsinnaalissallutik. Kommunit qimminut akiuussusersuisartunik sulisoqareerput ilaatigut perlerornermut akiuussutissanik kapuisarlutik. Qimminik akiuussusersuisartut taakkuunissaat naatsorsuutigineqarpoq akiuussusersue-riaatsimik nalunaaqutsersuisarnernullu suliqaarnissaannik ilinniartinneqassapput, tamakku-ninngami suliqaarnermik misilittagaqareermata.

Qimmeq qimuttoq Kalaallit Nunaata oqaluttuarisaaneranut ilaavoq sulilu piniartunit aalisartunillu piniarnernut piniakkanillu assartuineranut atorineqartorujussuulluni. Taamaamat qimmit taakku sapinngisannguarput tamaat atorlugu illersornissaat pingaarluinnarpoq, qimmit iluamik pineqarlutik peqqissuunissaat isiginarlugu, kisiannili aamma siunissami inuuniarnitsinnut piorsarsimassutsitsinnullu tunngaviujuarnissaat qulakkeersinnaajumallugu.

Taamatut oqaaseqarlunga Inatsisartut inatsisissaattut siunnersuut Inatsisartunut akuer-sortumik oqaluuserisassanngortippara.